



Nunami maani angerlarsimaffeqanngitsut pillugit ajornartorsiuteqarnermut aaqqiissutissanut eqqarsartussamik suleqatigiisitamik suligasuartussamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaq politikerinut aaqqiissutissanik tigussaasunik siunnersuuteqassaaq innersuussuteqarlunilu aamma kingusinnerpaamik ulloq 31. august 2019 saqqummiussissaaq suliniutissat akilersornissaannut aaqqiissutissanullu.

(Inatsisartunut ilaasortaq Tillie Martinussen, Suleqatigiissitsisut)
(Siullermeerneqarnera)

Angerlarsimaffeqannginnerup akiorneqarnissaa pillugu iliuusissatut pilersaarummik kigusinnerpaamik UPA2020-mi Naalakkersuisut saqqummiussinissamik peqquneqarnissaat pillugu Inatsisartunut aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqtigiit)
(Siullermeerneqarnera)

Inuit ilaquariilluunniit angerlarsimaffeeruttarnerannut pissutaasut amerlaqaat. Nunatsinni angerlarsimaffeqanngitsut 900-t akornanni angerlarsimaffeeruttarnermut pissutaasut aamma inuttut atukkat assigiinngitsut 900-rujuugunarput.

Demokraatini piffissaq ungasinnerusoq isigalugu suliarilluakkanillu aaqqiissutissanik nassaarusuppugut. Immikkoortuni assigiinngitsuni tikkuarnikuuarput iluarsiipallanniaannarluta iluarsiisassanngitsugut, ajornartorsiutilli qiterpiaa ilisimallugu iluarsiiniartassasugut pinaveersaartitsisassasugullu ullutsinni ajornartorsiutigisatsinnut.

Nalunngilarput ajornartorsiuisoruta, tassami § 37 naapertorlugu apeqqummut nr. 2017-230-mi erserpoq nunatsinni angerlarsimaffeqanngitsut 878-t nalunaarsorneqarsimasut aamma soorunami kisitsit tusaraangatsigu eqqarsartaqaagut iluarsiiniartariaqarluta. Tamanna Demokraatini isumaqatigaarput kisitsit appartinneqartariaqartoq siunissamilu angerlarsimaffeqanngitsut amerliartussanngitsut.

Pinaveersaartitsissagutta isumaqarpugut iliuseqartoqartariaqartoq. Namminersorlutik Oqartussat tungaaniinnaanngitsoq, kommunit tungaaniinnaanngitsoq aammali innuttaasut ataasiakkaat angerlarsimaffeerutilersut angerlarsimaffeerussimasulluunniit tungaanniit.

Pingaarteqarpoq ullumikkut inuusuttunut paasissallugu inuk nammineq imminut ikiortariaqartoq. Sakkortusinnaaqqooqaaq taamaoqarneq, kisianni assersuutissarpasuaqarpoq inunnik atungarlrioriarlutik ingerlallualersimasunik. Soorunami inoqartuarumaarpoq immikkut ikiorneqartariaqartunik taakkulu soorunami ikiussuagut.



Qanittunnguakkut Sermitsiami ineqarnek pillugu atuagassiaq saqqummerpoq, tassani takutinneqarpoq Namminersorlutik Oqartussat nuna tamakkerlugu 5.873-nik inissiaateqartut kiisalu 2.778-nik kommunit inissiaateqartut. Tassa pivagut katillugit inissiat 8.651-t, pisortanit akisussaaffigineqartut.

Neriuppunga siunissami inuusuttut amerlanerusut namminneq illutaartalerumaartut aamma pisortat ullumimut naleqqiullugu inunnut ilinniarsimasunut aalajangersimasumillu suliffilinnut ineqarnikkut pisussaaffikinnerulerumaartut. Kissaatigaarput siunissami pisortat inunnut ajornartorsiornerpaanuinaq inissaqartitsisalerumaartut soorlu inunnut inuttut qajannartunut.

Misissorusupparput nunatsinni angerlarsimaffeqannginnerup akiornissaanut periarfissat suunersut aammali angerlarsimaffeqanngitsut pillugit ajornartorsiuteqarnermut aaqqiissutissanut eqqarsartussamik suleqatigiisitamik suligasuartussamik pilersitseqqusineq pillugu Naalakkersuisutulli isumaqarpugut ajornartorsiutinut aaqqiissutaasinnaangitsoq massakkorluinnaq.

Taamatut oqaaseqarluta Naalakkersuisut allannguutissatut siunnersuutaat ilalerparput siunnersuullu Ilaqutariinnermut Peqqissutsimullu Ataatsimiititaliamut ingerlateqqillugu suliareqqitassanngorlugu.